

五  
星  
流  
星  
集  
卷  
之  
五





觀象玩占卷之十一  
亢宿

月五星干犯占

熒惑犯亢有白衣之會天下大疫有苦角則灾大一曰大臣忌之

火乘亢右星為大兵為水粟貴一曰有奇令乘亢左星大人憂

火入亢兵起天子廷中有水灾石氏曰火數入亢其國大疫東官

候曰火入亢北星天下白服五穀大貴火入亢環繞之成勾已

郝萌曰有謀主之臣有亡國火十二月入亢勾已環繞之天子

失廷火逆行于亢君臣咸失其道一曰有火災逆行守亢天

子廷中有兵火守亢甘氏曰天下樂民受壽守之久則為兵災

大水一曰五穀不熟民病死又曰有土事巫咸曰小臣為亂兵起

天下旱萬物不成海中占曰天下易政道路不通有白衣會一曰

大將有喜一曰天下多火災郝萌曰貴人病死留十日后忌之一

曰天子有祠廟事天下病頭疾東官候曰米貴天下民憂水船急





用芒角陵犯白衣暴聚麻麥倍價 守亢三十日疾病大作海中  
占曰火守亢三十日勾已環繞之天子自將兵國易主 火守亢  
色黑荆州占曰守十日水萬里不測二十日有沒國三十日澤成  
海又曰大赦 火與亢合主命者凶 火舍亢其歲小水河圖曰  
火舍亢陽有喜舍其陰其國有憂 火留亢荆州占曰天子惡之  
郝萌曰天下大憂焦旱物不生多蟲蝗起  
填星犯亢朝臣為亂諸侯有失國者 土入亢國多盜賊萬物不成人  
多疾疫 土逆行亢甘氏曰女主持政一曰土星徙倚亢前後女  
主非其人若賤人女暴貴荆州占曰春夏為火秋冬水災  
土守亢石氏曰五穀傷人流亡甘氏曰旱有土功郝萌曰田宅賤  
又曰五穀以水敗蟲生人疫 巫咸曰土守亢南多火災人疫有  
中兵物不成守亢北有水或曰土守亢色青有兵黃有土功 乙  
已占土守亢天下安 土乘亢右星水災 乘左星大兵起穀貴  
一曰土乘滅亢右星大人憂天下有奇令

土出入留舍亢有失地之君一曰其國以威致天下一曰國有兵  
果實賤賤人女暴貴有水

太白犯亢有兵行疾期一月行遲八十日黃帝占太白犯亢有芒角貴  
人有戮者陳卓曰太白犯亢廷臣作亂

太白逆行犯亢亂兵起人主憂 太白入亢中國有兵喪石氏曰  
其國多疾病乙巳占曰若行疾陵犯而有芒角朝廷貴臣有戮者  
期一百日遠八月又曰金數入亢其國疾疫

金出入留舍亢鄭地無年多亡民一曰五穀霜死

金守亢為兵天下道不通一曰天子自將兵于野石氏曰宜收斂  
邊城嚴兵以備北胡巫咸曰國有水君憂荆州占曰有兵牛馬急  
有姦吏郝萌曰為焦旱多蝗蟲有亡國一曰五穀水傷多盜賊一  
曰有水賊 金行亢宿北兵起期六十日行亢南下道大旱亦曰  
兵起

辰星犯亢名曰陰閉三光大水洋洋無有立墻一曰其下國疾疫或曰



諸侯有失國者一曰其分米貴民多流徙一曰逆臣為亂 犯亢  
右星有大兵國有奇令萬物不成穀貴

辰星守亢國有憂天下亂久守之人疫水災多盜賊兵起人民交  
惡 水逆行守亢大人憂主令不行兵起一曰為中兵 水入亢  
其國疫 水乘亢左星萬物不成穀貴 乘亢右星大兵起有奇令  
水舍亢歲有水且旱

客星流星彗孛干犯占

客星犯亢甘氏曰中國不安政亂兵起期一年 客星出亢石氏曰有  
出使者以色占一曰多兵郝萌曰愛臣以口舌自殺海中占曰其  
國大旱穀傷貴人去其鄉若有芒角地動期三年 客星黃白色  
出亢中人有受賜者 客星入亢夏氏占曰人流亡郝萌曰天下  
亂又曰有旱期三十日一曰有小水傷八穀又曰士卒出有戰期  
不出九十日 荆州占曰客星入亢天子有德令色黃期六十日  
色青期春色赤期夏白期秋黑期冬 海中占曰客星入亢有疾

疫復出之則疾已或曰有來使受命于廟 客星入亢色黃有宗  
廟事色黑廟中有喪色青有傷色白有兵有主喪 黃帝占曰客  
星入亢廊廟間有兵武氏占曰後宮有暴亂 客星出氏入亢中  
而散人主有病 大赤星從角之亢人主遇賊 赤氣出入居亢  
氏間廊廟有戰

客星與亢合宰相反國易政 客星守亢巫咸曰有德令黃帝占  
曰國臣有不祥者郝萌曰臣謀主不成而敗天下不通多蝗蟲米  
帛貴有奇令一曰下田傷海中占曰國多妖東官候曰五穀頻不  
成 荆州占曰客星守亢色赤為旱青饑人流亡黃白無害人憂  
芒角地動

流星入亢石氏曰有使者來受命于廟一曰幸臣有自殺者期一年王  
蕃曰宰相與中官作亂一曰外國有使來乙巳占曰大兵有戰  
流星色黃白入角亢間有貴客來見君廟 流星入亢中大臣走  
死 流星出亢天子遣使清獄有赦令



流星犯亢在春夏妖言興秋冬盜賊起水災

彗孛出亢天下大饑其國有兵喪人相食大疫期不出三年一曰天子失德天下大亂有大水兵疫一曰天子更法令 彗孛入亢民流亡 彗孛犯亢國有大災夷狄寇亂中國不安兵起臣叛武氏占曰大饑

雲氣干犯占

雲氣青色入亢人疫出氐入亢人君有疾 黑雲氣入亢有水災一曰

有使出外言水事荊州占曰人多瘡疾 黑氣出氐入亢君有疾

死 赤雲氣入亢廊廟間有陳兵 赤而揚波大人憂大疫 黃

白雲氣入亢有治事 白雲氣入亢有土功人疾病

晉惠帝永興元年七月太白犯亢占曰有大兵人君憂是年有

蕩陰之役九月王浚殺幽州刺史和演攻鄴鄴潰於是兗豫

為兵衝 康帝建元三年十月甲辰月犯亢占曰兵起將軍死六月將軍

陳達攻壽春敗還七月氐蜀餘寇反亂益土九月石季龍謀伐涼州五年征北大將軍褚裒卒

### 氐宿

總敘

氐四星曰天根為天子宿宮休解之房后妃之府一曰天府土星也主皇后妃嬪前二大星主正妃後二小星主左右媵其北二尺為日月五星中道氐又主徭役其星明大則臣妾奉法人君安天下無汗馬之勞暗小則君失勢臣妾不度動搖則徭役不時移徙或不見則臣妾內亂兵起一曰氐星動大臣去國

日月變異

日在氐蝕天子以疾死石氏曰御相讒諛人君滅無辜甘氏曰戒在公卿大夫且有相譖誤主使過刑者又曰后有憂一曰內亂 日暈于氐女主自恣臣下有兵謀甘氏曰大將有殃人多病死王蕃



曰君有女憂

月在氏蝕黃帝占曰天子憂疾一曰后妃惡之石氏曰大臣死後官多疾病荆州占曰治耕之臣有黜者一曰內亂

月暈于氏人多病郝萌曰不出四十日有治道路事一曰水蟲多死人不安王蕃曰國君女主皆憂 月以冬三月暈氏有大水天子不安有赦 正月月暈氏兵起 武密占日月與歲星同在氏而暈不出四十日有赦令

月在氏而有變皆為宮中有陰謀君后不安

月五星干犯

月犯氏天子兵起一曰其國有憂有軍在外將死一曰宮中有事大人女主居宿不安一曰刑政失天下兵饑天文論曰盜起將軍誅水蟲海中占日月犯氏左星左中郎將誅犯右星右中郎將誅月入氏中天下兵起 月乘氏右星天下有大兵天子自將兵于野 月蝕氏翳其一星一將死于戰一曰月奄氏有陰謀大將死

歲星犯氏石氏曰國無儲荆州占曰木犯氏左星左中郎將誅犯右星右中郎將誅若環繞勾己之其國饑君令不行

木乘氏左星天子自將兵于野 乘氏右星天下有大水大兵木入氏中不出其年有赦

木逆行氏臣主失職諸侯為王者之事一曰其君治宮室過制度木舍氏其國歲熟賤人有疾 木居氏海中占曰五穀以旱傷郝萌曰木處氏西歲多饑傷處北有小賊貴人多徙牛多死其肉殺人處南馬多死人多病寒熱

木出入留舍氏石氏曰氏者天庫之星也其國有急令其歲則吉若環而守其國以兵致天下

木守氏石氏曰皇后有喜一曰天子立后甘氏曰君有喜守之二十日以上其國大利並咸曰木守氏國饑民流人多疾病陳卓曰五穀蟲蝗萬物不成荆州占曰諸侯人君有來入官者行疾期六十日行遲期百二十日海中占曰有旱天文論曰孽妾有喜歲熟



巫咸曰木守氏居其南地動或曰木守氏三十日其地有立王者  
木逢行守氏后妃有憂去兩星二尺期一百二十日去之一尺期  
六十日與兩星齊期二十日鄰萌曰木逢守氏君不居其宮乙巳  
占曰木逢行犯守氏國大飢人流亡亦為多病

熒惑犯氏臣僭上人主憂一曰有內亂後宮有火災荊州占曰火犯氏

左星左中即將誅犯右星右中即將誅期三年  
火入氏甘氏曰天子失其宮入守之留二十日不下有賊臣在內  
有反者三十日不下國兵起人主忌之又曰氏天子之宮罰星不  
宜入之是謂不祥守之其國君死石氏曰火入氏留二十日國君  
有繫餓死若毒死者荊州占曰火入氏留二十日大發兵戰近期  
三十日中六十日遠百日

火逢行氏國失地一曰多火災一曰後宮失火荊州占曰地動一  
曰大臣謀反入之其事成

火守氏石氏曰大人憂強國當之有繫王餓而死若近臣憂非一

國也又曰大國憂天下不安甘氏曰大臣相譖有兵大戰巫咸曰  
君有疾兵起其君惡之海中占曰國亂有反臣不出六十日赦不  
徧天下歲春旱晚水不出其年人相食鄰萌曰有徭役地震守二  
十日相死西北之夷來國家有小喪又曰臣謀主 荊州占曰火  
以秋九月守氏色赤黃有奪地死王期一年

火守氏已去復還守之其色黃白有赦與兩星齊期十日去之尺  
期六十日 黃帝占火守氏既出之復還守之強國之君惡之巫  
咸曰天子坐之石氏曰火守氏去之旬日復還有大兵起國亡地  
火以戊辰歲句已入氏犯西南星光合者到已巳歲大將軍誅大  
赦天下 火守亢而入氏中三十日大人當之其遠氏者大將病  
在氏南行國有小喪在其陽為男陰為女

火入天門至氏前進退人主無出國無之遠宮其門有伏兵  
火出入留舍氏天下大疾 火乘氏左星天子自將兵于野 乘  
右星天下有大水大兵 火與氏合國失地



火與木同守氏賊臣為亂

填星犯氏左星左中郎將誅犯右星右中郎將誅

土入氏中陳卓曰期三十日彗星出王邑西南指一曰果實大賤賤人女暴貴一曰其國有兵喪失地

土逆行氏女主不居宮 土乘氏右星天下大水乘左星天子自將兵于野 土徙倚前後于氏女主左右有匪人

土出入留舍氏天下用兵期不出四年更立侯王一曰有亡地之國 土守氏皇后有賀事一曰賤人女有暴貴者官中有土功事

一曰有立天子有赦令一曰有賊臣為亂石氏曰國有大賢武氏占曰歲安土星色赤則四夷不服天下大疫有裂土之君一曰天

下徭役田宅大貴郝萌曰土守氏色黃潤澤太子有智慧天下安寧變色則有死王有亡國荆州占曰土守氏姦臣有謀色青其國

君死守之八十日以上其國兵起 土星東行而還守氏皇后大人憂與兩星齊期二十日去兩星一

尺期六十日去之二尺期百二十日

土入氏而守之國有亡城者天下用兵更立侯王不出三年守之八十日不下野有萬人之聚

太白犯氏左星左中郎將誅犯右星右中郎將誅 甘氏曰太白犯氏天下徭役兵起一曰有兵兵罷無兵兵起一曰其分疫有拜將荆

州占曰太白犯氏有芒角有大兵王者亡地一曰其分君亡 太白入氏天下大疫有兵石氏曰霜雨不時郝萌曰春糴大貴又

曰國亂大人憂君失地 太白入氏而守之兵加其國 五星同 太白守氏國有變君失地一曰兵起將軍受封爵荆州占曰天下

有大喪海中占曰兵起而不行甘氏曰大臣受賜與兩星齊期十日有赦

太白乘氏左星天子自將兵于野乘右星天下大水大兵荆州占 曰太白守氏房間大飢六畜死

辰星守氏大水漂浸城關萬物不成守之八十日兵大起巫咸曰水守



氏多惡風海中占曰天下大旱五穀不收一曰為水又為旱

水犯氏甘氏曰有獄事貴臣憂天下大疫國易政

辰星入氏中負海國大水 水乘氏左星天子自將兵于野乘右

星天下大兵大水五星同

客星流星彗孛干犯

客星犯氏後官有亂暴兵起一曰有獻女者一曰婚禮不正天文論曰

其國憂

客星出氏人主憂病有德令或曰邊邦獻女或曰君有憂於外國

黃帝占曰客星出氏色黃白與兩星齊期十日有赦去之一尺期

六十日二尺期百日 客星守氏人主憂病石氏曰天下中外不

通馬有急行國易政郝萌曰臣欲危其主巫咸曰兵起國亡天下

俱動海中占曰有德令荆州占曰木器布帛倍價又曰麻麥牛羊

貴武密占曰客星守氏五十日不下官中有刺客 黃帝占曰黑

星守氏大水白星守氏廊廟有憂黃星守氏後宮有喜赤星守氏

近臣謀逆兵起官廟中 客星起氏中天子不安其宮女主失坐

客星出氏東有白衣之會 客星入氏石氏曰棺木貴黃帝占曰

日蝕地震粟貴有奇令甘氏曰邊邦有獻女者郝萌曰主有疾復

出之疾已陳卓曰兵從邊起後官亂兵動五穀不成黃帝占曰客

星入氏色白郎將受賜色黃遷青黑不死則黜一曰客星入氏色

黑大水其國有改主廊廟有憂色赤有兵在廟中近臣誅殺貴人

客星入氏中而散人主有疾中外不通馬急行大臣秉權君失勢

客星乘氏左星牛馬大貴 客星逆行乘氏若守之諸侯有坐法

誅絕無後者守之久不去客入官中 逆行貫氏中主奪勢臣執

權徭役大起

流星入氏天子有疾兵起國有大水一曰國相疾一曰上卿憂又曰祕

閣官有事石氏曰民飢役又曰後宮有喜天下有兵色赤黑后妃

不安 流星春夏入氏大臣黜秋冬入氏為水旱

流星觸氏國多淫女 抵氏多怨女 流星出氏有使出布天子



令 流星大如雞子出氏中西北流不出三年人主憂一曰有亡國

彗孛出氏有赦石氏曰天子不安一曰有徙官有易政一曰天子失德

其國大疫米貴兵起 彗孛入氏兵起臣弑主一曰後宮有暴兵

甘氏曰彗孛行入氏中後宮有異兵動 彗孛犯氏其地兵起有

大赦武氏占曰糴貴黃帝占曰臣弑主兵起天下更政期一年荆

州占曰天子寢疾宮中亂人大疾疫

雲氣干犯

雲氣入氏黃白色有土工 黑色大水 赤有內兵 蒼白色疫疹大

行 白色天下疫久不散宮中有女喪 黑氣入氏房間天子遣

使于諸侯有口令

漢宣帝地節元年正月辛酉熒惑入氏中占曰氏天子之宮熒

惑入之有賊臣後四年霍氏謀反坐誅

順帝永建五年夏熒惑守氏占曰諸侯有斬者是冬定遠侯班

始腰斬馬市

晉穆帝永和五年六月癸亥月犯氏東北星占曰大將當之七

月慕容恪攻冀州刺史呂護于野王護奔滎陽時桓溫以大

眾次宛聞護敗乃退

### 房宿

總敘

房四星曰天牀總管四方一曰天旗一曰天市一曰天龍一曰天倉一

曰天表一曰天衡一曰天府木星也甘氏曰房為明堂天子布政之宮

也石氏曰房為四輔其北上第一星上相也次星次相也次三星次將

也南下第四星上將也南二星為君位北二星為夫人位房又為四表

中間為天衢大道亦謂之天關黃道所經日月五星之所行也南二星

間為陽環亦曰陽間其南為太陽道北二星間為陰間亦曰陰環其北

為太陰道七曜由乎天衢則天下平由陽間則多旱由陰間則多水或



失行而南由太陽道則為大旱為喪失行而北入太陰道則為大水為兵又曰房為天馬亦名天駟主車駕其南為左驂次上為左服北星為右驂次下為右服又為天廐主啓閉蓄藏之所房星均明則王者明臣奉職天下太平兵革不興星暗則王道不行臣亂政驂星欲明而不欲大大於中二星則兵起星離圻則人流星亡則兵大起左驂左服為東南右驂右服為西北房星動外則財寶出動內則財寶入

日月變異

日在房蝕石氏曰大臣專權人主憂一曰大臣有黜者一曰大臣有相譖而坐法者

日暈于房天下大凶王蕃曰女主凶君夫國一曰兵起君臣失位月在房蝕石氏曰王者憂臣專政京房占曰天子有喪郝萌曰人主以兵亡一曰大臣有黜者

月暈房宿國兵起于廟堂之中有戰郝萌曰財寶出穀貴荆州占曰月暈圍房四方兵起暴骨于野又曰其地大疫水蟲多死 暈勾

三宿有大風小赦句五宿大赦 武氏占曰月在房暈貫箕大風拔木地動搖期百日有赦

月變于房車騎滿野

月行房陽環多暴事黍稷不為月行陰環多陰事將軍出伐 月行四表之南大旱稻粟不成多暴獄驚駭內亂一曰有女主喪君憂河圖曰月行太陽天下亂民心離 月行四表之北陰人將革禍不可克又曰大水有亂臣河圖曰月行太陰天下兵悉起民流亡 凡候水旱專伺月行至房若由中道則時和歲豐若行陽環小早行太陽大旱且有喪行陰環小水行太陰大水且有兵又曰月行房南一文多暴獄大旱天下亂民事失老幼啼哭陽道未窮而死月行房北一文天子有亂臣陰道未窮而作歲且多雨大水為災臣下謀亂殃及萬里



觀象玩占卷之十一

觀象玩占卷之十二  
房宿

月五星干犯

月犯房上將上將誅犯上相上相誅次將次相亦如之黃帝占曰天下  
殃人主憂一曰月犯房有亂臣不出三年臣伐君有亡國陳卓曰  
兵起荊州占為死亡近之辱將相一曰四足之蟲多死  
月乘滅房左右官有誅官廟中有伏甲陳兵天子不可下殿 郗  
萌曰月中乘房左驂服皆為君死中乘右驂服皆為夫人死 荆  
州占曰月中犯乘凌房星君有憂色赤兵戰青喪黑將相誅色白  
大哭

歲星守房有德令甘氏曰天下和平海中占曰他國有獻馬者魚鹽貴  
十倍又曰天下諸侯相謀道不通又曰人主不可下堂一曰胡兵  
發郗萌曰國無儲倉粟虛又曰大飢人死不葬有大赦荊州占曰  
木守房王者心平百姓得情一曰有反臣大臣死天下易主石氏



曰有白衣之會男子盡發又曰其國多禍殃吏民相傷大臣滿道而行又曰五穀熟黃帝占曰木守房七日不出有死王十五日不出兵大起

木犯房將相憂其分有災石氏曰有暴貴者荊州占曰王政失近臣叛 木入房天子有子一曰有更令荊州占曰五穀熟天下安一曰大將受封 木經房南而犯守之大旱由房北犯守之大水木出房東行而復還守之若環繞句己之天子惡之一曰后夫人有喪

木與房合鄰萌曰有兵戰有白衣之會一曰木與房北星合大水與房南星合大旱 木舍房色黑不明有大水有喪

木星不由天衢王者不居明堂 木舍房南五穀旱傷民多寒熱病舍房北多雨五穀水傷牛多死其肉殺人舍東馬多死舍西民飢

木中犯乘陵房國君憂色青為喪赤兵黑將相誅白有芒大哭

木逆行犯守乘陵房以其所中命之又曰臣有陰謀天子失位而亡 木星順行留房中道其色明潤而無所犯人主將相俱有喜人和歲豐王道大行守之愈久國祚愈長

熒惑犯房有亡君將相憂后妃有殃視其所中命之春秋文耀鉤曰將軍為亂王者惡之黃帝占火犯房芒角怒有大兵改正朔天下俱憂火中犯凌乘房國君憂色怒芒角大憂青色疾疫白死喪黑將相誅赤有流血積屍

火入房大臣反天子憂兵起宮中一曰有白衣之會一曰馬貴出之則還賤一曰地動有犬赦將相憂鄰萌曰君弒 火入房三道天子有子一曰火入房出其北主憂出其南臣憂出中道而留天子有喪期九十日若一百二十日天下大赦

火行房南旱若守之為喪行北道水若守之為兵

火逆行于房宮中失火一曰地動 逆行成句己其國有反兵臣弒主一曰熒惑句己房主命者凶 熒惑環繞房心往來徘徊宮庭中



有伏兵

火與房合車馳人走天子為諸侯所逐

火貫房中央天下兵悉起出其南男子災出其北女子災

火守房大臣作亂天子被圍天下交兵五年石氏曰天下更政黃帝占曰貴人疾有兵喪居之三日車駕有驚十日不去山崩天子失官一曰天子宫火災有易位石氏曰火守房火近于木子滅其母十日不去國有喪十五日不去兵大起二十日不去臣弒君子弒父民去邦邑陰陽相剋天下大動期不出一年又曰火守房大飢人死不葬良馬出巫咸曰多水災一曰土工興留三十日胡兵發地動兵大起荆州占曰火守房兵起大臣盜國寶后宗大臣凶秦燕趙大殃海中占火守房三日鬼火夜行人恐驚多死喪郝萌曰火以九月守房兵車滿野父子盡給軍事家無留者甘氏曰火守房天子之車馬敗

火行不由房中道石氏曰不出其年有兵

火守房已去之復還句已環繞之國有兵喪諸侯起霸天子失其宮火守房間直心而留房天下大亂西方殃東方昌 火守房北燕趙凶守房中魯衛凶守房南吳楚凶

熒惑太白合于房明堂空天下哭

填星犯房石氏曰天下相誅荆州占曰國君死右服為秦魏左服為楚右驂為齊左驂為趙 土犯房成句已后夫人死

土入房三道天子有子海中占曰土入房若犯之有失地之君其分國有兵女主憂 土入房居其左右有去嫡主庶之事 土之房五穀豐

土守房甘氏曰旱久守有兵石氏曰天子更起宮室工役煩興國多禍殃又曰國有女喜巫咸曰有獻馬者一曰貴人多死一曰地動人疫郝萌曰有兵大赦一曰胡兵發大飢天下諸侯相謀道不通荆州占曰有反臣大人死國易主 石氏曰土守房左國交易守房右天下多繆夫寡婦 土守房左右去復還庶子秉國



土逆行于房成句已女主自恣若淫佚郝萌曰土逆行守房女主  
干政若逆行乘守左右驂主崩臣有陰謀逆行乘陵中道天子失  
位而亡 土失行至房天子出入不時一曰有誅殺  
土中犯陵乘房左驂左服其君死所中將誅中犯乘陵右驂右服  
后夫人死所中相誅一曰土星中犯陵乘房皆為君憂以色占之  
太白守房臣脅君土工大興國亂布帛貴父守之大飢國易主黃帝占  
國有大喪大臣有戮死者石氏曰良馬出廐兵車滿野中國有殃  
王者失位期二年巫咸曰國有更令相作亂兵四起又曰旱多火  
災五穀萬物不成郝萌曰有姦謀人主無下堂荆州占天子馬多  
死有反臣六畜多死 石氏曰太白守房左去復還太子去復還  
其國有廢立天子太白守房右去復還臣盜主命黃帝占曰太白  
守房南旱天子有良輔守房北水天子有良友  
太白逆行守房天下多死喪 郝萌曰太白逆行犯房成句已大  
臣憂一曰天子忌之

太白中犯陵乘房四夷起謀中國有憂李筮曰有兵戰一曰將相  
誅牛馬疫一曰天子憂色青憂喪色赤有兵赤而芒角積骨成山  
色黑將相誅赤黑同白有大喪一曰太白犯房天下相誅  
太白出入留舍于房霜雨不時人飢馬牛多死

辰星入房三道天子有子入十日成句已天子忌之

水守房甘氏曰姦臣謀主大臣相譖暴誅臣佐天下乖離郝萌曰  
人多暴死一曰良馬出廐天下道不通一曰天下大水一曰諸侯  
相謀有易主有反臣有大喪石氏曰兵起將劫掠一曰胡兵發一  
曰有白衣會一曰馬貴 水逆行守房天子中毒官人食糟糠  
水守房東去而復還成句已后夫人死一曰大飢人相食死不葬  
大水兵起

辰星犯房馬大貴一曰有赦穀貴人飢姦臣有謀天下相誅一曰  
大臣誅以其所中命受誅者一曰將軍作亂天下大水  
辰星中犯陵乘房左右驂若左右服皆為人主崩臣有陰謀所中



將相被誅遂行則天子失位而亡一曰凡辰星中犯房皆為國君憂以其色命所憂者五星同然辰星入守房心之間地大動

### 客星流星彗孛干犯

客星犯房甘氏曰王國空兵起人飢骨肉相殘

客星出房郝萌曰名寶出又曰近臣謀主若暴死期一年荆州占曰青星出房而散人主馬牛奔散郝萌曰客星出房表北大水出表南大旱出其中道馬貴黃帝占曰客星出房若守之在陽為旱為喪為飢在陰為兵為飢為水

客星入房米貴人相食多流徙石氏曰諸侯有獻馬者郝萌曰大臣為逆天下有急令亦有更令荆州占曰有德令有賊臣兵起天下有大喪郝萌曰客星入天廡中滿三日有赦一曰馬貴出之即賤白星入房下北門有攻戰排門者在近臣期百二十日赤星入房馬貴國被圍天文論曰客星入房歷陽道旱歷陰道水若入房左右服有獻馬者若出之人君以馬賜諸侯

客星入房而守之臣弑主客星守房米貴十倍一曰官中有謀近臣為逆一曰有急令馬瘦一曰人主以馬為憂

客星舍房左右羣臣有奪爵邑者一曰有飲藥死者客星出房心間地動

流星出房天子有使出賑飢一曰流星出房左右服天子遣使之諸侯

以馬為幣流星入房天子殺忠臣流星如蛇曲行入房臣為

逢輔臣亡流星抵房外國有貢異獸名馬者一曰其國君死一

曰宰相出鎮流星衝房水災流星犯房將相有黜者

天文論曰流星春夏犯房土官憂土工與秋冬犯房相憂人飢

彗孛出房天子失德諸侯舉兵甘氏曰天下水旱人民飢死郝萌曰兵

戰不止蜚蟲交下一曰名山崩天子宫中有火天下有喪戴麻紛

天子亡彗孛犯房若貫之王宮有大兵亂石氏曰人亂國危天

下相殘有亡國

### 雲氣干犯



雲氣入房赤黃潤澤名寶入出房國寶有出者 黃雲氣入房外國入  
貢黑雲氣出房官中有憂 黑氣入房諸侯有使來言口令之事  
且有大冰 赤雲氣入房官中內亂大兵起 赤雲狀如人入房  
后有娠不然姦事起 赤雲氣如波揚入房官中火災兵起廟廷  
紅雲氣入房諸侯王多死期三年 蒼白雲氣入房將相憂 白  
氣如大道入房委蛇入漢國有大水兵起官中人民流亡餓死路  
傍屍骸不收不過二年帝主崩婦女傭客不還 雲氣如帶經兩  
角間入房關門閉再經之兵起三經之天下不通

漢明帝永平十六年正月丁丑歲星犯房右驂第一星不見辛  
巳乃見占曰房右驂為貴臣歲星犯之為見誅其後司徒邢  
穉坐與阜陵王延交通知逆謀自殺

和帝永元五年火犯房北第一星占曰為將相六年正月司徒  
丁鴻薨

晉惠帝光熙元年九月己亥填星守房心占曰填星守房多禍

喪國內亂天下赦是時司馬越專權終以破滅十一月帝崩  
懷帝即位大赦天下

### 心宿

#### 總敘

心三星曰大火亦曰大辰一曰天司空一曰天相火星也心為明堂中  
央大星天王正位其北四尺為日月五星中道前星為太子後星為庶  
子心者木中火故其色赤心為天之關梁中央大星欲赤而明則天子  
明德服天下暗小青黑則天子微弱不能斷制星不欲直則天子失計  
心主天下賞罰故天下有變則心星見其不祥三星欲其俱明前後星  
不欲過其中星而後星又不欲其過前星前星明過中星則太子踐位  
後星明過前星則庶子奪嫡前星暗小則太子憂後星暗小則庶子憂  
心星動搖則國有急芒角則天下有大兵難徙則民流散失色則人主  
太子俱憂色黑則國有大死喪消不見則江河為害期九年天子滅旁



天子以駟亡  
天子以駟亡  
天子以駟亡  
天子以駟亡  
天子以駟亡  
天子以駟亡  
天子以駟亡  
天子以駟亡  
天子以駟亡  
天子以駟亡

日月變異占

日在心蝕兵喪並起甘氏曰君臣相疑政令乖錯將相異心刑罰不中  
石氏曰臣謀叛武氏占曰國易政人主惡之

日暈于國易政人飢兵起

日在心宿而有虹蜺背璣干之人飢兵起國有大喪有叛臣

月在心蝕石氏曰人主忌之太子庶子俱有憂三公有死者郝萌曰臣

伐主內亂荆州占曰大臣有黜者海中占曰國有兵喪

月暈于心石氏曰有大戰大水出山崩谷塞一曰國有火災海中占

人主有殃一曰大旱荆州占曰主憂將死又曰有兵三十日罷無

兵三十日起石氏曰粟大貴天文錄曰四足蟲為害郝萌曰月暈

在心三日不風不雨不出三十日有大喪有奇令 月以正月暈

心蠶不繭圍心將易主死赤地千里 月一歲再暈圍心有大火

大旱將舉兵國易相期二年 月暈心五重女主死 月暈心三

重赤雲貫之國有喪戮侯王 月圍心暈中有赤雲若白雲如杵

貫月大人當之有大兵起

月變于心人主憂兵在外大將憂無兵則太子有事天子計失於刑罰

月五星干犯占

月犯心其國有憂若有大喪郝萌曰大人憂海中占曰月犯心中星天

子惡之乙巳占曰有內亂宮中有逆臣石氏日月犯心大星國人

為亂人主遇賊又曰女執行臣弒君犯前星太子不得立憂賊臣

有亡國犯後星庶子惡之 月以六月辛酉犯心國君亡

月乘心石氏曰其國相死出心北其國旱火焚宗廟出心南其將

相起兵一白月乘心大人凶天下大旱萬民備火

月奄心三星俱翳國內亂賊臣起兵大將死大飢天子太子皆有

大憂 月行心宿而翳霧大水山崩谷塞

歲星中犯陵乘心大星天子惡之前星太子凶後星庶子凶一曰木中



犯陵乘心宿有內亂甘氏曰臣謀主若旱土工興春夏米貴秋冬  
米賤若守之六十日不下國有急令郝萌曰大人憂近期十月遠  
三年一曰有亡國人主太子俱憂巫咸曰戰不勝將死一曰天下  
旱多火災又曰大臣災海中占曰木犯心中星王者絕嗣石  
氏曰木近心七寸以內有暴貴者不出百八十日木乘心石氏  
曰其國相死出其北為旱火焚宗廟出其南兵起  
木經心其色潤澤光明烈照不失軌道天下和平人主壽昌  
木行心不由正道王者不居明堂  
木入心郝萌曰天下諸侯有慶賀事  
木居心海中占曰五穀以旱傷其色潤明王者有福人和歲豐色  
黑不明有喪  
木出入留舍于心有德令春夏米貴秋冬平二十日不下冬兵大  
起負海國大敗  
木守心石氏曰年豐天子有慶賜巫咸曰有火災郝萌曰貴人多

病死一曰五穀萬物不成荊州占曰木守心七十日以上陰陽和  
四夷服一曰木守心東南馬多死其肉殺人守心西萬物不成人  
多餓傷守心南多病寒熱守心北牛多死其肉殺人  
木逆行心若環繞句已之大人忌之海中占木逆行犯守心賊臣  
謀逆王宮內亂天子易權在大臣之得勢者

熒惑犯心王者戰不勝大將鬪死一曰人主亡海中占王者絕嗣貴人  
有餓死者郝萌曰有反臣有死君巫咸曰萬物不成土工興民憂  
火災犯太子太子憂犯庶子少子憂

火乘心石氏曰其國相死火入心大臣反天子憂入前後星太  
子庶子憂兵起相死于野

火守心石氏曰大人易政主去宮移又曰有流血其國兵悉出天  
下人死半大旱布大貴一曰有逆臣又曰將為亂甘氏曰大臣為  
變天下諸侯並起巫咸曰萬物不成土工興大水災海中占天下  
哭聲吟居之三月國有殃五月受兵十月其國亡民流郝萌曰



天下兵四起天子軍破玄冥占大飢人相食國主死天下大潰海中占火在心南為水在北旱郝萌曰火守心南有男喪守北有女喪又曰火以十月守心北不出其年國有大喪又曰火以十月守心期六十日有辱主一曰火守心是謂侵陽幸臣驂乘有事火守心已去之復還守之有大赦一曰主命者凶甘氏曰熒惑守心句已環繞之天子失其宮石氏曰大臣反大將戰死火守心色怒赤芒角天子廷中有伏兵色黑有亂兵事不成而敗伏其辜一曰火守心色赤兵起青有喪在心東為齊魯在西為秦晉在中為周宋在南為楚在北為燕趙又曰火守心色赤臣謀主兵起色白臣有賜壽者色青大人憂色黑天子兵在外敗

火逆行而西守心石氏曰國有大喪兵起國易政郝萌曰早有火災地震守之二十日大臣作亂哭泣吟

火舍心石氏曰天下大兵色黑為喪乙巳占曰大人振旅天下兵火留心近臣為亂留二十日主病留三十日主病困

火貫心天下大飢 火與心合主死不則出走又曰天子易火與心鬪天下有暴喪 火芒角起如鋒刃磨心以行天子官庭有陳兵 火中犯陵乘守心明堂巫咸曰大臣當之在陽為燕在陰為胡一曰有火異又為旱

火逆行心王宮內亂臣下謀易主權在宗臣得勢者

填星犯心天子絕嗣其年萬物不成犯太子太子不立犯庶子少子憂

土乘心其國相死一曰有大赦

土中犯陵乘心為內亂臣欲弑主一曰有失地之君期十月遠二年荆州占曰大人凶東官惟曰萬民備火巫咸曰天子兵敗將軍戰死一曰旱石氏曰大臣當之乙巳占曰天下大赦

土奄食心天子因后有憂 土入心五穀熟天子大臣有喜

土經心行正道光明潤澤照天下同心人主壽昌

土居心黃帝占曰人主任賢天下有慶巫咸曰君明臣良郝萌曰和氣應五穀熟土出入留舍心二十日不下有急令三十日不



下有名人死四十日不下其國空民亡

土守心石氏曰聖帝出臣伐主天子亡國有赦久守之有水且旱

一曰有火災萬物不成一曰其國相死一曰義士多烈節庸夫立

義一曰太子庶子出 土守心色赤黃光明吉色黃無故色赤兵

起其國內亂土工興民多病色青黑大飢赤黑太子謀不利主

土逆行于心女主怨望 土逆行守心若句已環繞之其國內亂

天子忌之海中占曰天子宫中有賊臣謀易主

太白守心大飢黃帝占曰天下有大恠國有大喪一曰多蟲巫咸曰君

弱臣強有逆臣石氏曰中國有殃兵車滿野有軍在外客軍大敗

一曰天下人多死喪其年蝗蟲敗穀海中占不出一年貴臣左右

有大兵鄰萌曰天子亡大臣死

太白犯心為喪甘氏曰天子怯兵將軍亡劔戟上殿羣臣逃奔海

中占天子絕嗣犯太子太子不立犯庶子庶子憂鄰萌曰太白犯

食心左星女主失勢太子不死則去荊州占太白犯心君后走藏

一曰穀貴 太白舍心色黑不明有喪

金逆行守心國有大喪大臣憂天下多死人有軍在外客軍大飢

金逆行守心環繞句已之大人憂李筮曰有大戰天子將死軍敗

太白中犯陵乘心為旱天下多火災一曰相為亂兵四起大臣憂

太白出入留舍心三十日不下國兵大起

辰星中犯乘陵心大人當之一曰內亂臣弑主有亡國若環繞句已則

其禍成 辰星犯心或乘之大雨水地動海中占民去其鄉甘氏

曰水旱俱作甲兵大動石氏曰辰星犯心水滅火三日不去主憂

臣戮百川大溢一曰犯中星王者絕嗣犯前星太子憂犯後星庶

子憂

水守心布帛貴石氏占與犯同巫咸曰徭役煩賦斂重不堪命多

盜賊武氏占曰王政失紀民人交惡大臣受戮天下易主一曰臣

謀其主辰星在陽為燕在陰為胡一曰水守心大人以外兵死色

赤為大兵旱色黑大水且喪



水舍心色不明有喪  
水逆行守犯心天子中毒死宮人食糟糠

觀象玩占卷之十二

觀象玩占卷之十三

心宿

客星流星彗孛干犯占

客星出心石氏曰君遣使于諸侯以色占其事及其吉凶以其所至命

所之國甘氏曰天下大旱兵大起國易政期三年郝萌曰客星出

心左右或上下有抵罪而走者色黃白無事青黑死赤以兵隨之

客星入心石氏曰諸侯有使來以五色占何事以所起占何國夏

氏占曰有德令一曰相有憂疾甘氏曰赤星入心留回之天子

以兵死郝萌曰客星入心十日成勾己有大赦黑星入心近

臣謀主赤星入心兵起宮中入右星太子起兵入左星庶子起

兵青黑星入心天子憂入右星太子憂入左星庶子憂黃白

星入心天子有喜入右星太子受賜入左星庶子受賜赤星大

如杯盃赤如雞冠入心中人主遇賊其出心也行道最遠人主戕

于千里之外青星如珠入心中人主遇盜期年中



客星犯乘心大旱天下慎火一曰人主以宮室臺榭廢政一曰米貴兵起近臣叛大人憂國易政 客星犯心而守之石氏曰宮鐘大鳴劔戟交橫大臣相疑天下舉兵近期七日中七十日遠百八十日 客星舍心兵起

郝萌曰心上有星去心一尺所有中謀心下有星去心一尺所有外謀星多人多星少人少上下俱有星中外俱有謀星遠人遠星近人近近期百日中期在衝遠一年

客星逆行奄滅心宮內有亂有賊臣謀易主者

客星守心黃帝占曰不過三旬有善令巫咸曰粟貴人飢兵起有姦臣郝萌曰土工興有大人喪天下人病或曰其國亡天旬占曰蜚蝗大起人流亡有反者春秋聖洽符曰客星守心五十日不去兵大起國有喪米貴十倍

流星入心不出其年國有大喪一曰臣弑主不出三年天文論曰外國有使來色赤以兵黃土功白義青憂黑凶

流星出房入心天子遇盜

流星自外入心宿分遠國使來星大為大國使小為小國使

流星出心大臣出使以五色占之 流星犯心兵起宮中一曰大

臣相賊大人憂視其所中 流星春夏犯心有火災

彗孛出心是謂天地謀易天下主黃帝占曰天下相射夷狄勝中國敗臣為君一曰天子死德令不下蝗蟲作五穀傷人流亡期一年遠十年 彗孛入心有喪太子不立石氏曰大臣造亂兵大起一曰兵起宮中流兵廟庭大臣相戕天下被甲近期七日中七十日遠百八十日

雲氣干犯占

雲氣出心青色天子使人于諸侯 赤色有兵將出 赤黃氣出心王

就國 黑雲氣入心天子憂入左星庶子憂入右星太子憂一曰

黑氣入心右星庶子受賜祿 白氣入心天子左右臣作亂兵起

白氣入心左星太子受賜 赤氣入心有立王 赤氣出心南行



天子左右有亡去者 赤雲氣鋒銳正刺心天子憂 蒼白氣入  
心中星天子憂 黃氣入心天子有子孫喜入右星太子喜 黃  
白雲氣潤澤如匹布正抵心下外國有來歸者 雲氣狀如彗帚  
色赤如血入心天子遇賊出心天子有殺伐若出遠則殺伐人於  
千里之外

秦始皇帝時熒惑守心及天市芒角色赤如雞血始皇既死嫡  
庶相殺二世即位殘骨肉戮將相秦國遂亡

漢高帝十二年春熒惑守心四月宮車晏駕

成帝陽朔元年七月壬子月犯心星占曰其國有憂若有大喪  
房心為宋今楚地十一月楚王友薨

綏和二年春熒惑守心二月乙丑丞相方進欲塞災異自殺  
三月丙戌宮車晏駕

安帝永初元年五月戊寅熒惑逆行守心前星占曰為反臣時  
帝未臨朝鄧太后攝政司空周章謀閉宮門廢太后及帝事

### 覺自殺

三年正月庚戌月犯心後星占曰不利乎心為宋五月丁酉  
沛王牙薨

孝桓永壽二年七月丁丑太白犯心前星占曰為大臣後一年  
大將軍梁冀使太倉令秦宮刺殺議郎那尊又欲殺鄧后母  
宣事覺收印綬自殺誅諸梁及冀妻孫壽宗族皆徙邊

靈帝光和三年四月熒惑逆行守心後星十月戊午月食心後  
星占曰為大喪後三年帝崩

中平六年八月丙寅太白犯心前星戊辰犯心中大星其日  
未冥四刻諸黃門殺大將軍何進於省中己巳車騎將軍何  
苗為部將吳匡所殺

晉武帝太康八年三月熒惑守心占曰王者惡之太熙元年四  
月乙酉帝崩

唐玄宗天寶十三載五月熒惑守心五十餘日占曰王者去其



宮明年安祿山反帝出奔蜀

### 尾宿

總敘

尾九星蒼龍尾也一曰天雞一曰折木一曰天狗一曰風后一曰天廟亦曰天司空一曰龍旄一曰九子水星也尾為後宮后妃之府其北十尺為日月五星中道其上第一星主后次三星主夫人又次三星主九嬪次二星主媵妾其第二星又為后族旁一小星相去一寸曰神宮天子解衣之內室也尾又主八風箕尾之間謂之九江口故尾星又曰九江主水九星欲其均明大小相承則後宮有序后妃不妬忌天子多子孫微暗則后有憂疾動則后妃不和騰躍圻絕不居其所則君臣乖天下亂有災早就聚則有大水直則皇后失勢大小不齊則妾媵奪嫡蓋天曰蒼龍之尾陰陽之所交雷風之所興也主禁密祭祀時養之事星明則五穀成熟不明則五穀大傷

### 日月變異占

日在尾蝕后有憂甘氏曰有疾風發屋折木人主戒出入天文論曰有兵喪將死一曰貴臣有刑者武氏占曰後宮有憂燕地飢北夷侵境

日暈于尾陰國弱或曰將相憂巫咸曰主女喪

月在尾蝕御乘人有黜者甘氏曰后族若御妾有坐法者一曰貴臣犯法乙巳占曰君族有刑者武密占曰女主惡之

月暈尾其分益地有疾疫荆州占曰后妃有廢者郝萌曰歲不登不出其年有赦武密占曰女主死不死則病

月暈心尾無骨及四足蟲為害國易政山崩麥貴

月暈尾箕其分疾民多病寒熱大風至有大水

月在尾有變後宮不安一曰后妃有不才子在宮中王蕃曰女主亂政虹蜺背孺將相有憂

### 月五星干犯占

月犯尾君臣不和郝萌曰貴戚有誅者其國有軍在外則將死一曰後



宮有爭人主有不令子已在宮中

歲星入尾石氏曰天下諸侯有慶賀事期九十日巫咸曰王者立太子后宮有賜若后族有昇顯者東宮候曰妾為嫡臣專政災禍由起乙巳占曰有易后太子不出百八十日木入尾而守之巫咸曰人君以嬪為后政在宮中一曰政在下臣

木守尾旱巫咸曰多火災河圖秘徵曰臣謀逆兵起車馬出石氏曰民為變大臣反逆亂從大將家起一曰宮中有讒諛之臣急黜之一曰穀貴天子欲封寵后族郝萌曰天下牢開有大赦一曰歲多妖后有恐守之三十日以上天子立后或生太子

木逆行尾宿天子淫佚木守尾逆行成句巳女君夫人死

木舍尾處其東馬多死處其北牛多死肉皆殺人處其西傷穀處其南民病寒熱一曰政暴急木處尾旁旱水木犯尾穀貴女主夫人惡之視其所中木乘尾民乏食木留守陵乘中犯尾后夫人有以珠玉簪珥惑天子者讒誣大起貴臣誅死宮人出走

宮中大亂兵起宮門

木出入留舍尾其國當以義致天下尾者燕星也留三十日不下有大水留五十日不下其國大臣有出亡者

熒惑入尾三月客兵聚郝萌曰宮中有讒臣石氏曰天下藏兵荊州占曰縑帛貴將相人民離其城東官候曰後宮有憂女主惡之一曰幸臣亂宮火留尾箕臣下淫亂

火中犯陵乘尾皆為天下有兵大戰一曰后妃夫人忌之視其所中言災火逆行尾宿後宮失火天下有大水荊州占曰君淫佚逆行守尾兵起車騎聚于道大人宮中內亂國易政火繞尾踟躕不去人君以妾為妻

火出入留舍尾齊伯曰其國且無人兵雖起不用土工興留二十日有火災火舍尾居其陽吉居其陰國有憂

火守尾石氏曰歲多妖祥甘氏曰后有恐民為變國易政兵始動巫咸曰天下大飢人相食郝萌曰馬牛多死芻藁大貴一曰君弱



臣強下陵其上一曰臣謀主后宮干政民多死喪天下士卒行一曰大臣作亂有反逆從大將家起一曰宮中有匿謀妃妾有諸后者若光相及女主凶荆州占火守九江赤地千里穀貴民流布貴藥草倍貴三公九卿為姦大將反一曰有大水

郝萌曰火入尾箕九州當其禍以其入日辰占甲乙日為東方丙丁日為南戊己日為中州庚辛日為西方壬癸日為北方

火與水星同在尾箕有赦 火與土同在尾大將出征益米貴

填星守尾色黃有喜石氏曰禽獸多暴于民玄冥占曰后夫人有喜一曰天子立后巫咸曰兵起海中占曰高田不得食下田荒人大飢

郝萌曰大臣誅 土星守尾芒角動搖天下更主易政人不安居 土逆行入尾妾為女主一曰女主不居其宮女多以色進者

土出入留舍尾大將出師魚鹽大貴 土犯尾國多盜賊石氏曰天下旱人飢兵起乙巳占曰女主妃夫人惡之 土入尾人飢兵起

太白犯尾民為變國易政一曰女主憂天下亂國乏糧

金守尾甘氏曰宮人有犯罪者巫咸曰有兵亂多水災五穀不成

一曰宮人有罪者為亂郝萌曰蟲蝗大作軍無糧士卒滿道不行

一曰金守尾近女主去遠女主死巫咸曰太后去宮人多死之

太白出入留舍尾兵起于野一曰米貴其歲仍荒

太白中犯陵乘守尾妃后有以珠玉惑天子者讒誣大起后與相

受誅宮人出走兵起宮門 太白抵尾人主惡之

太白入尾大臣起兵人民受殃石氏曰兵起西方一曰近臣為亂

太白入尾而守之兵大起民多妖言期三年

太白失行入尾或犯之不有破軍必有屠城

辰星入尾天下大水江河決溢魚鹽貴三倍米貴

水守尾大人女君惡之一曰大飢人相食民離其土君子賣衣小

人賣兒又由妃后有亂執政得事有水災多疾病一曰以水兵起

一曰後宮有得罪者一曰用事者殃有大赦海中占兵起事成下



賤易貴 水中犯乘陵 蓬守尾占同太白

客星流星彗孛干犯占

客星入尾甘氏曰天下飢人相食流徙他鄉疾病死亡男不得耕女不得桑一曰宮中忌之春秋聖洽符曰大水石氏曰北夷太飢來降又曰國多土工有尾之禽大災一曰多風雨宮人災皇后去其宮賤女有暴貴者 石氏曰蒼星入尾故臣有從他國來使者 白星入尾邊城有兵司空死之一曰備賊臣 客星出尾歲多大風大雨水為災一曰後宮有憂一曰君使人于諸侯備賊臣陳卓曰兵革罷敝天下大飢黃帝占曰天下人民多死

客星守尾賤女入宮

流星出尾君臣相伐色青黑臣有逃者

流星入尾后妃有憂一曰有黜者一曰賤女暴貴一曰故臣有歸國者前赤後白人主死將軍行從酉至昏期十日從昏至入定期九十日 流星犯衝尾后妃有貶黜春夏犯后宮口舌起秋冬犯

有妖言者被誅一曰佞臣受誅

流星抵尾后妃死天子不安

彗孛出尾歲多惡風暴雨天下大水大飢后相貴臣皆有憂

彗孛入尾后妃有以珠玉簪珥惑天子而起讒誣者后與相皆有殃兵起宮門貴臣誅國易政土工大興期百八十日犯之同占

雲氣干犯占

青雲氣入尾故臣有來歸者出尾臣有死者 白氣入尾故臣有謀來歸而受誅者 黑氣入尾故臣有來歸骸骨者 赤黃氣入尾有使來言兵事 黑氣出尾人民流亡 青氣出尾臣作亂 赤黃氣出尾君遣使于諸侯言兵事

晉惠帝永興元年七月太白犯尾箕占曰女主憂又曰天下大

亂是時劉琨石勒李雄等並起跨有州郡皇后羊氏數被廢黜



箕宿

總敘

箕四星曰天津一曰天漢主津梁一曰風口一曰風星主八風一曰狐星主狐貉一曰天雞主時亦曰天陣金星也又為女相主口舌又曰天后後宮之別府也其北六尺為日月五星中道又主蠻夷戎貊四夷將動必占於箕箕星明大則五穀蕃熟諛諛不用四夷來庭暗小不明則君違國亂四夷不服內外有睽動則蠻夷有使來拆則大風為災且有口舌相殺事離徙則人流亡君失地就聚細微則歲凶粟貴其中小星少亦如之移入河則歲大惡中河而居則人食人箕前二星謂之天舌芒動則有大風不出三日

日月變異占

日在箕食有疾風發屋折木大臣諛佞忠臣有誅者

日暈于箕大風為敗

月在箕蝕大風為災郝萌曰車騎發陳卓曰人相食一曰君族有刑者

若御妻有坐女主憂

月暈于箕五穀以風傷郝萌曰月暈圍司空不出百里必有守倉求食者以千計之荆州占曰大風發屋有坐口舌死者又曰北夷燕趙皆大飢 荆州占月暈箕歲星在其中王者納妃妾不出一百八十日

月在箕有變後宮政教失妃嬪乖怨有暴風 月失行于箕風大起

月五星干犯占

月入箕粟大貴天下旱饑死過半人君暴虐政令不平民失其所石氏曰後宮干政大風為災郝萌曰國亂君死有故月在箕踵期三十日在箕口期六十日

月犯箕有讒臣君臣不和女主憂郝萌曰其國有兵將死

歲星守箕甘氏曰宮中有口舌事多惡風歲旱飢人相食郝萌曰貴人多病死又曰歲有大水多土工又曰大人衛守又曰木守箕在東歲熱在南旱在北水在西大飢東官候曰木守箕七日以上去之



七尺以內貴女有尊進者

木犯箕其歲多惡風五穀貴郝萌曰女主宮人有憂天下大赦乙巳占木守犯箕天下大旱人相食餓死者過半

凡木星中犯陵乘箕皆為惡風

木入箕石氏曰天下大亂凡箕中有一星民莫處其室春秋緯曰木入箕若犯之兵大起郝萌曰木入箕糶價三倍又曰宮中有口吉荆州占曰歲不熟盜起多鬪死者巫咸曰木入箕中伺其出日而數之期二十日兵發又以其始入日數之率一日期十日兵罷五星同

木居箕多旱居箕踵則歲熟

木出入留合箕若守之六十日不去其國以武致天下箕燕星也木之箕其年多風 木逆行箕君淫泆

熒惑犯箕后妃有憂郝萌曰天下國相擊男不得耕女不得織牛馬大死火乘箕牛馬死北夷大飢來略

火入箕中天下大亂民莫居其室春秋緯曰兵起主失位荆州占后族有口舌事期六月一曰倉粟發一曰盜大起人多鬪死又曰歲凶人多餓死乙巳占火入箕天下大旱穀大貴人多死又曰火入箕中若守之天下兵起吏人相攻士卒半死人民流亡不居其鄉又曰國失地

火守箕石氏曰人主惡之郝萌曰有大赦黃帝占火守箕左歲惡天下勞其分君有疾國有內變甘氏曰火守箕天下大飢久守及環繞成勾已大臣誅有水且旱平澤溢如海孝經援神契火守箕多土工霜雨不時春秋文耀鉤曰主恐其國更市又曰人主自恣天下分離臣子各自為謀郝萌曰貴臣亂國有淫事政急地動守之三月彗星出荆州占曰火守箕有大淫事九卿當之又曰胡貉有憂又曰火守箕前其國惡守箕後糶貴三倍 火以十月守箕天下大赦海中占曰是謂火入水萬民飢死穀貴五倍 火舍箕郝萌曰用事者坐之又曰熒惑舍司空三十日車大出牛馬大死



芻大貴又曰後宮干政君有憂一曰臣下有淫亂  
火出入留舍箕天下有兵吏民相攻國失地飢  
火留止箕口中有兵二罷無兵二起吏民相攻人去其鄉宮中相  
讒內外皆亂

火入箕去復還守之巫咸曰大臣亂國土工興貴人死大水道不  
通天下大飢

填星守箕水災萬物不成人民飢死久守兵起米貴人流有赦石氏曰  
后妃夫人有喜若立后一曰王者陵發後宮有亂一曰多雨蟲有  
空國有死王客水至海中占曰有大喪土工興一曰人主有謀  
土犯箕女主憂有赦春秋緯曰天下大亂兵大起巫咸曰石氏荆  
州占皆同木星

土出箕石氏曰穀大貴天下旱飢死過半 土出入留舍箕其年  
多蝗蟲留之九十日人流亡兵大起期一年東官候曰小人為政  
有空國有死王客水至人飢國亂亡

土舍箕角動色黑有土工色赤大兵色青兩軍相當先起者敗中  
起者昌後起者亡

太白犯箕石氏曰天下大飢郝萌曰女主憂一曰王者亡地一曰後宮  
有喜

金守箕兵起有赦更立人主久守旱有大風國內亂兵起巫咸曰  
多土功民疾疫海中占曰天下有兵若角動天下無所定郝萌曰  
歲多水萬物不成米貴天子德令不行一曰執政者為亂大人衛  
守 金守箕口民多誹謗

太白入箕荆州占曰人主自備下有兵巫咸石氏占同歲星郝萌  
曰天下有兵戰又曰有赦出之米貴若有土功

太白出入留舍箕五十日不去甘氏曰天下大恐多蝗蟲不入燕  
燕國且以義致天下

太白逆行箕成句已石氏曰大臣為亂兵起天下憂人主當之期一年  
金火相隨而變火舍天門西金舍天津中人主無出門若之速宮



辰星守箕五穀少收一曰其歲水災女主憂一曰大旱多火災萬物不成一曰中國有大兵執政者當之一曰有惡風陳卓曰河水溢有赦乙巳占曰水守箕七日以内災禍起若有疾風解之則消水守箕角動色黑貴臣相戮亦曰有自殺死者

水入箕天下米貴十倍人流他鄉死者不葬一曰大人當之有大赦巫咸占同木星 出之穀大貴天下大旱餓死過半 水入箕色赤有內亂大風為災

水中犯乘陵箕大水江河決溢兵起有大赦歲多惡風  
客星流星彗孛干犯占

客星出箕官人出民飢大臣有棄捐者一曰客星出箕南旱出箕北水客星入箕天下大飢人相食民多徙棄國多土功一曰北夷大飢來降荆州占多暴風雨宮中不安

客星守箕工役大興秋冬水災石氏曰天下飢色赤為兵  
客星舍箕秋多水乘犯同 黃帝占曰客星守箕北小熟守東大

熟守南小飢守西大飢

流星出箕官人有出者一曰大臣有棄捐者

流星入箕多暴風雨一曰有獻女者若色黃則外國入貢

流星犯箕春夏犯金玉貴秋冬犯土工興天子大作宮城天下大勞

流星交對抵箕宮中不安多疾病口舌

流星大如斗沒箕中其下有流血

彗孛出箕大水出人大飢米貴五倍一曰夷狄入中國兵大起海溢河

波且有旱米貴十倍海中占曰天下多死喪詩含神霧曰彗孛

出箕若守之東夷下濕與水居將為亂

彗孛入箕若犯之大水海溢後宮有亂

雲氣干犯占

黃白雲氣入箕蠻夷有使來 黃雲氣入箕有獻美女者變而色黑道

死不至色蒼道上為風所覆 蒼白雲氣入箕其國有災出之災

除 黃白雲氣出箕天子使者出一曰官中美人有出者 赤雲



氣出箕兵出入之兵入  
晉惠帝太安二年八月熒惑入箕占曰人主失位兵起明年趙  
王倫篡位改元

觀象玩占卷之十三

觀象玩占卷之十四

斗宿

總叙

南斗六星曰天廟一曰天丘一曰天闕一曰天機一曰天府一曰天庫  
一曰天同玄龜之首丞相大宰之位木星也主天子壽命之期主酌量  
政事稟授爵祿日月五星貫之為中道其南首二星曰魁為天庫又為  
天梁主兵中二星為天相主爵祿北尾二星曰杓為天府主壽命將有  
天子之事占之於斗其魁第一星主吳第二星主會稽第三星主丹陽  
第四星主豫章第五星主廬江杓尾第六星主九江斗北大星亦曰天  
關天子之正旗也土官也六星欲其均明明盛則君臣同心天下安寧  
爵祿不替風雨順時人主壽康五穀蕃昌暗小則君臣失位天下不安  
芒角動搖則忠臣失勢天下愁怨大小不齊則上下乖違移徙則賢臣  
逐天下病變色失常則陰陽不調宰相憂之

日月變異占



日在斗蝕人主惡之春秋感精符曰將相有憂國飢凶兵起甘氏曰其國反叛武氏占曰吳地有兵

日暈于斗宗廟不安宗臣囚死又曰宰相易有誅戮人流亡

月在斗蝕女主惡之一曰國飢有小兵天文錄曰妃嬪有黜者一曰將相有憂兵起國亂

月暈于斗人流千里郝萌曰大將牛馬大病陳卓曰大臣免大將為

亂五穀不成 月暈箕斗兵從東北方來者勝從西南方來者不

勝一曰五穀不成易大將 月在箕而暈箕斗兵在外戰月在斗

兵罷

月在斗有變國易相壽祿失大臣憂刑膠有非理食祿更易天子法令者一曰近臣死

月五星干犯占

月入南斗大臣失位若有誅死者郝萌曰大臣憂一曰太子有殃一曰宮中有自賊者荆州占吳越有災期不出三年陳卓曰兵起大赦

月入斗魁中大人憂太子辱宮中有賊 月以子丑申入南斗京

房占曰後百八十日有赦無餘囚 黃帝占月以四月十月入斗

中天下大赦近期六十日中六月遠一年 月一年三入斗魁中有

兵起有德令

月犯南斗大臣誅大將及近臣去女主凶一曰將死陳卓曰風雨

不時兵起

月乘南斗色惡相死 月宿斗有風雨

歲星守南斗吳越有福其歲大豐守之六十日臣有增爵祿者 石氏

曰歲星守斗久則穀貴君臣乖失道者死

木犯南斗石氏曰有赦郝萌曰兵起大臣死春秋合誠圖曰大臣

有逆謀歲飢人相食 木陵乘南斗大臣有謀反伏誅者

木入南斗郝萌曰天下受爵祿近期六十日遠百二十日海中占

人多死者荆州占有大水陳卓曰歲旱卿相有憂太后惡之一曰絲麻賤

木經南斗吳國大稔經魁中失道之君若大臣死



木逆行入南斗陳卓曰有亡國死王春秋感精符曰大臣若國相為達天下離君臣乖木逆行于斗宿人君賞非其人逆行入斗魁中大臣謀作亂兵起水災穀貴木順行守斗已去之復還居之行色不失天下同心爵祿不僭時和歲豐其國大昌

木出入留舍南斗六十日不下大飢若有兵來伐其國則客軍大敗歲星居南斗海中占曰五穀以旱傷居其北不利小兒一曰牛多死其肉殺人居其西歲多飢傷民多死北官候曰虎狼入國居其南人多病寒熱一曰多亡狗居其東馬多死肉殺人一曰歲星居南斗北其歲旱水晚旱郝萌曰歲星居南斗旗其國不用衆而有天下旗者杓尾第六星也

熒惑守南斗國有憂相不安兵起黃帝占有亡國失地兵大動又曰穀出婦女轉漕若有諸侯客來見天子者一曰糴貴一曰太子疾吳越有憂五行傳曰為亂為賊為喪為兵守之久國絕嗣海中占曰旱多火災郝萌曰大人憂有赦一曰有內變一曰五穀不成地動

嬰兒多死關梁不通有廢臣天下亂乙巳占火守斗二十日有大赦又曰宰相出起已去而復還守之宰相死火以十月守南斗三十日民介胄不出一百日國以兵亡

火犯南斗有破軍殺將一曰有赦海中占曰有反臣道路不通丞相有事天下飢

火入南斗將相有謀反者石氏曰大國之臣外內謀大亂一曰其地有亂君又曰越人相食甘氏曰兵大起大臣誅郝萌曰國飢又曰立太子天下受爵祿一曰天下先潦後旱火入斗而守之三月吳王死二月后死一月相死不死則出走火晨出東方而入斗因守之其國絕祀

火留南斗無功者賞

火過南斗出斗上行疾天子憂出斗下行疾臣憂

火逆行南斗土工興若芒角怒動天下大震逆行入斗口中天子惡之逆行經斗而光芒及之其國君死



火出入留舍斗魁中五日不去天下起兵國易政火舍南斗西木果不實舍斗東天下大戰若環繞句已之大尉宰相死已出而復入大人忌之

填星入斗中有王者出不用兵而升天位郝萌曰天下受爵祿 春秋聖洽符曰填星入斗口而守之人背其主天下壅蔽在陽為天子在陰為諸侯荊州占曰將軍戮司馬彪天文志曰貴臣將相死或曰外國有使來見 土失行入斗中國失地又曰有喪兵起國中又曰天子不可出遊不可見諸侯

土守南斗王者封賞諸侯土官有受賜者石氏曰國多義士郝萌曰地裂山崩天子失制有大赦荊州占曰大臣逆姦人謀君在陽田宅貴在陰田宅賤一曰大臣有黜者一曰有暴水至武密占曰君臣俱不安守之九十日有水火之災

土犯斗石氏曰大赦已已占曰先水後旱若守之一旬名水有溢者不則水暴出 土出南斗兵起西方若西南方

土逆行南斗地動郝萌曰王者賞賜失節一曰女主淫佚賜予不

當一曰臣謀君

土居南斗河成間郝萌曰道路不通

土出入留舍斗三十日不下有大喪五十日不下彗星出九十日不下天下用兵

填星行南斗不由中道女主嫡子失位

太白守南斗執政大臣作亂兵起有赦黃帝占曰大人當之國易政一

曰所守之國凶一曰將戮一曰夷狄內侵有兵戰

太白犯斗小人在位有赦一曰有喪天下受爵祿 太白犯斗而

守之石氏曰有兵戰破軍殺將一曰國有兵事大臣有反者誅死

太白入斗國更政石氏曰將軍作亂大人禦守有大赦有兵在外

罷甘氏曰將軍誅國易政期三年海中占曰將相有被殺者郝萌

曰不出三十日有大兵相死陳卓曰國君死否則疾病

太白入犯南斗已去之復還守之有兵戰將死一曰大臣反名士

憂 金火同入南斗臣子為逆久留則禍遲而事久去速則禍速



而易平

辰星宿守南斗水災郝萌曰有兵易正朔陳卓曰萬物不成五穀傷敗  
洪範傳曰其國不可舉事用兵必受其殃荆州占曰鈇鉞用黃帝  
占曰辰星守斗赤而角天下敗白而大諸侯裂地相賂為和黑而  
小所守之國亡石氏曰辰星守斗在斗北民凍死在西狼虎入邑  
在南狗多死在東女子多死 甘氏曰辰星守斗角動而青黑色  
天下大水橋梁不通人大死

辰星失行守斗將相誅

辰星犯南斗有赦一曰有戮將死相天文錄有水災一曰其分有災

辰星入南斗巫咸曰大臣誅郝萌曰天下受爵祿 辰星入犯斗而

留守之有兵大戰破軍殺將

辰星之南斗天下大水傷穀人飢

客星流星彗孛干犯占

客星守南斗有兵絕道大水盜賊起國有喪君臣父子相殺久守之國

絕祀黃帝占曰君臣不相親兵起五穀先賤後貴郝萌曰諸侯有

謀工役興軍士走一曰大旱人疫宗廟憂火災天下易政土官憂

春秋文曜鉤曰客星守斗五十日臣謀主兵大起天子死國易政

期三年星色青白大水色赤大將戰死

客星出斗石氏曰天子使人于諸侯色青憂事赤兵事黃土功事

白義事黑凶事又曰兵大起大水天下飢人相食關梁不通期一

年郝萌曰赤星出南斗魁前宮中兵起出魁中將戮死

客星舍南斗為水為飢道路不通

客星犯南斗其國亂兵大起期一年陳卓曰王者病臣謀君子謀

父弟謀兄諸侯不通天下易政遠不出一年

客星入南斗石氏曰諸侯有來見天子者以五色言其事巫咸曰

下伐上夏氏占曰諸侯相攻郝萌曰多盜賊陳卓曰穀不登人相

殺 黃帝占客星入斗中三日不去城廓門閉道路不通貴人受

其殃外兵殺傷外國來而不降一曰獄官受誅有赦



赤星入斗中宮人生子非其子也

流星入南斗穀貴民勞有易王一日外國有使來色赤言兵黃言土功  
白言義青言憂黑言死喪事

流星出斗天子使出以色占其事以星所抵之宿占其所之之國  
流星犯南斗宰相憂一日春犯天子有災夏犯有水災宰相黜冬  
犯斗魁大臣逆主命

流星從南斗起入北斗有赦

彗星出南斗天下有勢者皆有謀甘氏曰大臣反兵水並起有戰流血  
天文錄國主憂一日宮中失火陳卓曰天子病諸侯睽不通

彗星入斗大臣反宮室焚 彗孛滅斗人主亡斗星明反者誅

彗孛犯斗主爵祿臣憂王者疾病臣謀君子謀父弟謀兄上下無  
禮諸侯不通天下易政大亂兵起期八十日遠不出一年一日吳  
越兵起有自立者三年而滅一日吳越有大水

雲氣干犯占

蒼白雲氣入南斗多大風 赤雲氣入斗兵起如波揚大旱多火災

黃白雲氣入斗諸侯來見天子不則有使者來貢 黑氣入斗宗  
廟中有大憂 赤氣入南斗外兵入出斗內兵出 黃白氣出斗天  
子使人于諸侯 赤氣入北斗還向南斗不出一年其下有流血  
將死營空客勝主人

漢武帝元鼎中熒惑守南斗占曰為亂賊喪兵守之久其國絕  
祀南斗越分也其後越相呂嘉殺其王及太后漢兵誅之滅  
其國

和帝永元五年九月金在南斗魁中占曰大將死十二月車騎  
將軍鴻坐追虜失利下獄死

順帝永和二年八月庚子熒惑犯南斗占曰斗為星熒惑犯之  
不替年國有憂有亂又曰多火災明年五月吳郡太守行丞  
事牟珍等及江賊蔡伯流等攻廣陵燒城郭殺都尉  
永和四年熒惑入南斗犯第三星斗為貴相為揚州火犯之



為兵喪其六年大將軍梁商薨九江丹陽賊周生等反攻沒郡縣

靈帝熹平元年十月熒惑入南斗其十一月會稽許昭等聚眾自稱大將軍攻破郡縣

晉惠帝永興元年九月太白入南斗是後陳敏作亂揚州

康帝建元三年閏月乙酉太白犯斗占曰為喪天下受爵祿九月帝崩太子立大赦賜爵

### 牛宿

#### 總叙

牛六星曰牽牛一曰天鼓木星也亦曰天關為關梁主犧牲之事陽氣始于牽牛日月五星常貫之為中道中央大星七政之始七曜之行起於此其上二星一曰即路一曰聚火主道路次二星主關梁次二星主南夷其中大星主牛牛星明大則王道昌關梁通天下寧不明則五穀

不成牛多災其小星大明則牛貴小而明則牛賤色怒則馬貴移動則牛多災殃星亡則牛盡死小星亡則小牛死牛星始見色黃則大豆賤色赤則大豆蟲傷色白則大豆貴星近漢則天下牛貴入漢中則牛疫死星直則穀價平曲則米貴失常變動則五穀不成甘氏曰牛上二星主道路次一星主關梁次南三星主南越動搖色從而占之牽牛亦為將軍中央大星左右出則大將心不正前星左右出則前將軍心不正後星左右出則後將軍心不正所謂前者大星南星也後者大星北星也

#### 日月變異占

日在牛蝕其國兵起甘氏曰戒在后夫人嬪婦有祠祝求幸者

日暈于牛陰國憂暴兵起

月在牛蝕其國叛兵起天文論曰其分飢一曰後宮有當黜者

月暈于牛小兒多死軍暴將死郝萌曰五穀不成黃帝曰有兵戰牛多暴死荊州占曰牛羊貴武密占有水災乙巳占月暈牛女女子貴月以冬三月暈牛一百四十日有赦亦為有賜爵之令



月變于牛關梁閉塞將有農令犧牲之事四足蟲多死

月五星干犯占

月犯牛牛疫馬牛羊暴貴犧牲之官憂將軍奔道路阻關梁塞天下有詐穀大貴大國有憂將軍死陳卓曰天下有大誅牛多死

月乘牛天下有大水人相弃于道一曰兵起馬多死武密占曰犧牲傷其主官有憂

歲星守牽牛天下和平石氏曰守之三十日至九十日四夷來朝海中占木守牛臣謀君米貴三月乃復巫咸曰馬災五穀多傷一曰陰陽不和農人死野孝經授神契曰木守天關在其北民流死在其西民多以風災死者又為虎狼入國在其南狗多狂亡在其東不利嬰兒郝萌曰木守牛東其春牛大疫守南夏牛疫守西秋牛疫守北冬牛疫又曰木守牛南三尺旱守牛北五尺水陳卓曰木守牛南五穀以旱傷守牛東萬物不成人流亡六畜多疫死牛為甚大臣有謀事守牛北人多凍死守牛西地氣發洩歲多水天文論

木守牛光明潤澤則粵人來貢

木犯牽牛越人有獻金銀者 木犯牛而留守之有兵戰破軍殺

將一曰牛多死

木入牛農死于野陰陽不和五穀多傷郝萌曰天下牛車行諸侯有失期者荊州占曰歲多水虎狼害人又多寒人多凍死一曰臣

謀主民飢貴人多死小兒亦多死

木經牽牛石氏曰越人以金銀來貢一曰筋革貴歲飢人有自賣者

木逆行牛君不愛其親戚一曰宮中火災

木乘牽牛郝萌曰有大水兵起人相弃于道

木舍牛虎狼入國邑歲旱 木出入留舍牛大將出客兵來大臣

有誅死者不出三年

木逆行犯守牛環繞句己之大水災道路不通

熒惑守牽牛有逆臣牛貴十倍人飢相食兵起將軍死大水津梁不通

黃帝占曰民為亂貴人多死巫咸曰多火災天下牛大疫道無行



牛一曰當有稅牛之事海中占曰旱一曰有急行一曰有犧牲之事有反者從中起有走軍死將期一年 郝萌曰火以十月守牛六十日兵大起一曰越王死米大貴天子有疾

火犯牛郝萌曰國君外其大臣陳卓曰臣謀主甘氏曰諸侯將兵人飢國亂大人憂之 火犯牛而守之甘氏曰有破軍殺將

火入牛巫咸曰米大貴石氏曰越王死不死則逐一曰歲大水津梁不通五穀傷 火入牽牛而出其南守之有大赦

火乘牛天下大水米貴人相弃於道 火出入留舍牛居其陽無咎居其陰為憂海中占曰春旱秋水關

梁不通齊伯占曰牛大貴薪芻急留三十日 以上客兵來 火逆行牽牛有反者兵起大飢

填星守牽牛有逆臣欲謀君在陽田宅賤在陰田宅貴石氏曰天下有急諸侯亦多忠烈者有大赦守牛南為天子憂守北為吳有憂郝萌曰土守天關氣洩貴人多死春秋合誠圖曰大人有疾牛馬疫

死海中占兵起夏寒人疾郝萌曰穀貴又曰山崩地震冬雷人病湧水出有急令陳卓曰益貴

土逆行牛女主為姦為賊 土乘牛天下大水兵起人相弃於道土入牛天下牛車大動一曰有盜賊

土經牽牛春秋合誠圖曰天下求皮革筋角 土出入留舍牛有失地之君 土犯牛天下工役興 土犯牛而守之甘氏曰有兵戰破軍殺將

太白守牛土氣洩有兵至城下人多死黃帝占曰吳越兵起牛多死十日不下牛大貴石氏曰有急令海中占有大赦巫咸曰五穀不成

兵革起人多妖言荆州占曰有兵戰人多死一曰犧牛死甘氏曰將為亂大人憂國易政一曰關梁不通石氏曰太白守牛北民流

亡守其西虎狼入邑守其南多狂狗守其東嬰兒多死 金入牛海中占天下牛車急行郝萌曰大臣為亂一曰天子車馬

在道路荆州占兵起人多死 金入牛而守之大人死將軍失衆



關梁不通民大飢

金犯牛海中占關梁道路不通國易政將軍為亂大人憂國有大兵 金犯牛而守之有破軍殺將

太白出入留舍牛三十日不下牛大貴五十日不下有兵至越城下辰星入牛五穀不成

水守牛湧水為敗守之久牛多死一曰人飢有凍死者一曰臣謀君虎狼害人巫咸曰五穀不成一曰牛度犧牲死海中占曰大水民棲丘陵齊燕尤甚郝萌曰人流亡荆州占關梁不通

水犯牛湧水出五穀不登有敗軍將為亂貴人死民多死喪關梁道路不通牛多死 水犯牛遂守有破軍殺將

水乘牛大水大飢人相弃於道

辰星急過牽牛水出一度一出五度小出六度大出地為之動辰星恒以冬朝于牛當朝不朝名曰失律二時不朝名曰失政三時不朝五穀不登

客星流星彗孛干犯占

客星守牛有兵石氏曰越人有獻犀象者郝萌曰天子外其大臣地軸占曰地大動一曰水賊起牛馬貴 甘氏曰赤星守牽牛民為亂

客星犯牛石氏曰吳越兵起有自立者

客星入牛有兵一曰賊起一曰有諸侯之客來以四足為幣以色言其吉凶郝萌曰大臣外交諸侯其色赤黃白謀成青黑敗乙巳占曰臣謀主五穀不登歲多水盜賊在江海

客星出牛君使人於諸侯以四足為幣色青道病黑死不至一曰客星出牽牛兵起大將出關梁阻塞地大動牛馬貴三倍期二年海中占人多死郝萌曰兵北行或曰諸侯有反者

流星犯牛其地將死一曰大將出期六月一曰有四足蟲來乙巳占曰

王欲改事春犯五穀孰秋冬犯五穀貴一云水災

流星出牛天下民流亡 入牛色黑牛馬瘦死色黃牛馬昌關梁通四夷入貢 乙巳占赤流星入牽牛將受命出之將軍出從星



所之  
彗孛出牛天下有更改之事不出七十日一日四夷兵起人主憂粟貴  
牛死

彗孛犯牛中國起兵吳越有亂牛死人灾一日天下更革有易姓  
彗孛行歷牽牛其分國亡石氏曰吳越有自為守而敗者

雲氣干犯占

蒼白雲氣入牛牛多死出之則災消 蒼白雲氣橫貫牛宿有兵喪除  
舊布新 黃白雲氣入牛牛蕃息一日諸侯有以四足蟲入貢者  
黑雲氣入牛天下牛多死 赤雲氣入牛牛馬多以漕輓死者出  
之則兵出 赤雲氣如波揚入牛有兵大戰牛馬大損 白氣入  
牛有兵喪

虹出牽牛之度有崩城期二年

晉康帝升平三年七月戊子月犯牽牛中央大星占曰牛大星  
為大將月犯之將軍死十月諸葛攸舟師入河敗沒豫州刺

史謝萬入朝衆潰而歸除名司徒會稽王以二鎮兵敗

孝武寧康二年閏月己未月奄牛南星占曰左將軍死三年五  
月丙午北中郎將王坦之薨

觀象玩占卷之十四



觀象玩占卷之十五

女宿

總敘

女四星曰須女亦曰婺女天之少府也一曰天女一曰天少府一曰臨  
官女水星也主布帛為珍寶庫藏其下九尺為日月五星中道須女者  
賤妾之稱婦職之卑者也故又主嫁娶知婦工其星明則天下豐女功  
就府庫充暗小則女功失職府藏空虛國用不足移徙則后妃廢天下  
婦女多以產死郝萌曰女星不明則法令易詩書絕甘氏曰女星動則  
天下有嫁娶事須女又主麻其色白則麻為色黃不為色青則麻以蟲傷

日月變異占

日在女蝕天下女子憂女工不成甘氏曰宮中有禱祠求幸者戒在巫祝

日暈于女後宮有憂一曰女主憂武密占曰後宮有囚病者

月在女蝕女主憂天下女工廢郝萌曰宮中有禱祠事戒巫祝武密占  
有兵旱石氏曰女主弱國有憂



月暈于女天下墳女多死有兵謀不成有大風起石氏日月暈因女  
有兵進而不聞一曰不戰而降河圖帝覽嬉曰有暴兵大戰將死  
荆州占曰布帛倍貴一曰民多去其居室絲綿貴 月暈女兩重  
以上女主死

月在女有變有兵不戰而降一曰有嫁娶事亦為女主布帛

月五星干犯占

月犯女河圖帝覽曰天下多女患陳卓曰將軍死國有憂一曰大人死  
女主病乙巳占女子多疾患人主有女惑有改易高下貴賤女工  
興有女令一曰多霧螻蟻死

歲星守女國有女喜歲多雨水人多凍死黃帝占曰大飢米斗三百人  
有自賣者石氏曰有女喪大水且至巫咸曰王者欲發財寶若發  
女工伎期不出七十日又曰萬物不成寡婦多死海中占曰天下  
有嫁娶布帛之事郝萌曰后夫人有變武氏占曰有火災  
木逆行女其君不重農桑 木逆行守犯陵乘女天子大臣俱憂

有奇令布帛貴賤不時

木入女甘氏曰有進美女者有立后宮人受賜

木經女石氏曰越人以金銀來貢

木留女郝萌曰宮中有水災一曰五穀水傷一曰布帛貴妾為主

木出入留舍女黃帝占曰三十日不下小人有慶五十日不下更

立侯王六十日不下兵起于野遠期不過衝郝萌曰不出二年天

下用兵

木犯女有內亂一曰外國有進美女者后妃喜宮中受賜甘氏曰

有立后太子

木逆行女人君不務農桑 木逆行守犯陵乘女天子大臣俱憂

有奇令

熒惑守女黃帝占曰皇后病宮中有火災一曰產婦多死布帛大貴文  
曜鉤曰人主以媵為后一曰有獻女者甘氏曰布帛出守之二十  
日布帛絲絲大貴陳卓曰大人不安五穀不成民多病國大飢巫



咸曰邦有女主喪官女憂牛角大貴郝萌曰后夫人有變一曰女子為政法令亂更國有嫁娶事臣下衣服僭侈守之三十日有叛逆君憂之海中占火守女國多妖大臣當之 荆州占火守女為政急火色青有女主喪官中憂色黑官女多死 黃帝占火以冬十二月守女西南姦人入邑守女北諸侯有嫁女絕國者一曰火守女北大水民擄水上

火犯女貴女多死者 火犯女遂守之女主死府藏中有伏兵甲一曰大臣憂

火入須女石氏曰主后死郝萌曰天子納美女一曰糴貴人多餓死荆州占布帛貴一曰多火災太白陰經曰兵大起

火出須女國有憂出其中人主憂出其兩傍羣臣憂留守之則有大憂 出入留舍女十日不去刀劍大貴五十日不下天下大愁國兵大起一曰吳越受兵 火之須女上求女 火舍女蠶不成留之有反逆者從后夫人家起

火逆行女至牛而還千里無稼穡

火犯守陵乘女皆為有反者從女家起若有女喪女主死其年米貴三倍人多死一曰官中有變有奇令若逆行犯守之其殃尤甚

火與土同在女宿女主惡之

填星守女人相啖食有惡疾有賤人暴貴有女喪一曰政在后宮女謁

橫行石氏曰多姣女巫咸曰天子多交好貴女與賤人交郝萌曰

大水且至乙巳占曰多妖女朝臣幸上 海中占曰土守須女之

陰山水出壞城郭天下多土功事一曰后有子喜

土入女天子納美女 土逆行女天子不親政事

土宿女逆行變色女主不重女工蠶桑 土犯女蠶凶有更令有奇政

土中犯陵乘須女人民相惡有女喪 土出入留舍女三十日天下有失地之君五十日不下有走王民

流亡吳越之國且以武致天下 太白守女臣下謀上兵起天下多寡婦府藏發布帛珍寶貴巫咸曰萬

太白守女臣下謀上兵起天下多寡婦府藏發布帛珍寶貴巫咸曰萬



物不成有嫁娶事都萌曰后夫人有變妾媵為主一曰妃嬪謀主起兵禁內北官候曰有女喪一曰太白守女去之一尺天下婦人多而男子少

太白入女中而守之幸臣與女亂妃黨謀主兵起於內庫藏金帛珍寶出 金犯女布帛貴兵起

太白出入留舍女其國棺木貴三十日不下兵起

金入女中有女喪大臣謀主

太白逆行犯守陵乘須女天子及大臣有疾有女令

辰星守女黃帝占曰天下有嫁娶事一曰他國有貢女者有水災萬物不成布帛大貴兵起大臣當之石氏曰有女喪海中占曰天下多雨水津梁絕不通都萌曰后夫人有變妾媵為主乙巳占曰女主御世天下大赦其國水國大亂一曰水守女南其地數被火守女北地數被水

水入女而守之其國有嫁娶事一曰有進女者后夫人有憂犯而

守之同

水中犯陵乘女若入之萬物不成荆州占曰天下多寡女布帛貴陳卓曰大雨水國飢人疫多死

水逆行陵犯女天子及大臣有變有奇令

客星流星彗孛干犯占

客星犯女鄰國有進奇女者一曰妾為后武密占曰宮中有出女有女亂

客星守女諸侯進奇女女暴貴一曰有女喪布帛絲綿貴都萌曰

女子亂國陳卓曰米貴甘氏曰人民為亂妾媵為妻有急兵大飢

人有自賣者一曰宮人憂貴人有死者一曰有兵江淮不通

客星入女麻象貴都萌曰天下諸侯有不通者荆州占天下有嫁

娶事絲綿貴一曰人君因納女亂國若入女而留不去天下阻塞

青星入女天下女子多以兵死 赤星入女有女喪

客星出女宮人有謀女主憂兵起宮中貴人多死速不過二年或曰女御有出者石氏曰有女事色黃白吉青黑凶赤憂暴出女女



主兵死期一年 客星舍女留不去有奇令

流星抵女女主有憂事乙巳占女主有事於君有流死者期不出一年

流星犯女貴女有下獄者天下蠶麻不成布帛貴春夏犯之大雨潦

流星出女宮人有出者一曰女御有出使者

流星入女天子納美女北地有兵一曰流星入女色黃白天子立

后色黑天下工女多死色白宮妾死

彗孛犯女陳卓曰有進奇女者國以女亂兵起乙巳占曰王者無信妾

為后國大亂期不出三年黜之則禍消又曰女主為政王者受其

殃將軍戮死若以戰亡期不出三年

彗孛出女王者以女亡一曰有水災鹽米大貴一曰國有女亂兵

起大戰 入女其國憂蠶麻不成王者惡之

雲氣干犯占

雲氣黃白色入女國有嫁娶事 蒼白雲氣入女天下女子多疾病出

之則災消 赤雲氣入女婦人多產死者一曰多兵死

白氣入女女子多疾疫 黑氣入女天下多女子之喪 黃雲氣

出入須女天下女子多喜事

### 虛宿

總敘

虛二星曰玄枵一曰顓頊一曰北陸一曰天節一曰臨宮一曰鄉中一

曰申宮水星也虛為廟堂為天子冢宰之官主死喪哭泣墳墓祭祀主

天子諒闇之事主北方又主黃鍾律管其下九尺為日月五星中道又

主風雲將有死喪哭泣葬祭之事則占於虛其星明靜則天下安不明

則天下旱動搖則有死喪哭泣歌斜則上下乖亡則享祀失禮鄰萌白

虛星動則有更田制者

日月變異占

日在虛蝕戒在主市租稅及繒帛器物金玉之臣黃帝占曰國有大喪

天下改服期九十日武密占曰大飢兵起



日暈于虛丞相下獄石氏曰民飢一曰有死喪

月在虛蝕有大喪天下改服郝萌曰民飢去其室家一曰有兵戰一曰典衣服刀劍金玉之臣有坐罪者

月暈于虛黃帝占曰兵起有戰郝萌曰民飢有哭泣螽蟴死一曰蜚蟲多死又曰有土工荆州占有白衣之聚一曰宗廟有兵民徙他鄉一曰宗臣黜否則冢宰黜 月暈虛危兵革離宗廟

月變于虛有土工軍在外飢 月五星干犯占

月犯虛天下大虛虛邑復盛天下政亂國有憂將軍死有哭泣一曰宗廟兵起百姓飢亦為有陵廟事

歲星守虛其國飢昭穆失序多疾疫郝萌曰天下兵大起君將離散士卒死亡又曰木守虛三月以上有列土受爵者黃帝占曰大旱穀大貴石氏曰女子多厄萬物不成土工興天子自將兵又曰木守虛七日以上盡三十日王者起宗廟修陵冢有白衣會不出九十

日甘氏曰木守虛失色天子改服不出六十日孝經緯曰木守虛東民多暴死守其北无咎守其西歲少雨守其南天子宫中貳政宰相之家坐誅

木入虛甘氏曰天下大虛郝萌曰國政急天下亂大人憂有德令荆州占曰有封立國邑 木入虛而留守之巫咸曰有立諸侯守之六十日不下國有死將百日不下改元大臣戮死期二年 木經虛齊國多憂一曰齊國有獻美女者一曰其君納美女

木逆行虛其國君不恭祭祀 木中犯乘陵虛海中占曰天下飢王者改一曰宰相誅有德令 木犯虛遂留守之荆州占曰居其東民飢且多暴死居其南官中 雨血宰相坐之居其西其月不雨居其北其下有亂

木居虛郝萌曰五穀以水傷 木出入留舍虛天下大苦 木犯虛遂留守之海中占曰王者改服有白衣會不出六十日天下大飢民流千里君臣離散



熒惑守虛天下大旱女子多死萬物不成工役興天子自將兵米貴十倍黃帝占曰赤地千里人相食又曰大臣為亂人疾疫石氏曰將反兵發天下更令甘氏曰民為變天下大水一曰民流死守之百二十日以上諸侯增地將軍受封

火入虛有火災君有恐郝萌曰功臣逐一曰牛車貴荊州占曰天下有變有破軍死將天下更政令諸侯有死者期一年天文錄曰有赦石氏曰火入虛中三月齊王死入十日相死不死即走巫咸曰火入虛中伺其出日而數之期二十日兵發又以始入之日數之率一日期十日兵罷火入虛成句已郝萌曰政令急天下亂大人憂戰不勝火入虛而犯之天子自將兵流血滿野火舍虛天子喜賜諸侯又曰火舍天府門中央天下赦舍其東東藩旱舍其南楚地旱舍其西廬江旱舍其北遼東西旱火留虛國以喪徭郝萌曰天子不敬祭祀女主大臣不謹留三十日君臣俱憂

火中犯陵乘虛天子自將兵有大戰流血有亡國死王期三年郝萌曰土工興石氏曰大旱穀大貴百姓多死

填星守虛風雨不時大旱多風米貴春秋文曜鉤曰土壅水有土工一曰官人多死一曰多病瘡死一曰有兵災大水萬物不成海中占人不安多妖言郝萌曰大臣有欲危宗廟者有亡國死王一曰政急國亂

土入虛中而守之石氏曰水且急進而守之有客兵缺鉞用一曰天下多空言土入虛有赦令大人憂天下大虛政急國亂一曰有兵五穀不成

土逆行虛荊州占曰君臣不敬祭祀女主不謹天下諸侯有官者宗廟血食盡罷土之虛國有大憂

土出入留舍虛中有急令行未當至而至有客兵不過五日去當至不至其國兵起

土中犯陵乘虛有急令兵起大旱有赦武密占曰星行疾有客兵



即去不出三年 巫咸曰土入虛中伺其出日數之與火同  
土與木同守虛名曰陰陽盡為大水災魚行人道民流無居三年  
大旱赤地千里

太白守虛國政急臣謀君兵起有流血石氏曰國多孤寡甘氏曰是謂  
毋覆其子太子承國有封拜賞賜者巫咸曰民疾疫天下亂萬物  
不成一曰有兵兵罷一曰天子將兵農人荷戟海中占東北胡為  
寇吳楚兵大起石氏曰太白守虛去之一尺粟貴十倍

太白犯虛天下兵起從齊始或曰有大喪

金入虛海中占不出九十日有大赦郝萌曰大臣下獄多土工民  
流亡臣謀君一曰國多孤寡

太白出入留舍虛其國君有疾大人有陰謀

太白在虛出芒角如劔空國起兵 巫咸曰太白入虛中伺其出

日數之期二十日兵起又以其入日數至出日率日期十日兵罷

辰星守虛旱萬物不成黃帝占曰多雨水入流亡石氏曰國內亂政急

大人憂天下虛海中占有兵丁壯行搖婦人獨居萬室空虛一曰

春旱秋水郝萌曰武臣誅國亡一曰山水出民無居 甘氏曰水

守虛角動色青臣欺君有喪兵起國中

水犯虛甘氏曰其邦多水災天文錄曰視辰星所在東南西北之

方以為春夏秋冬之期一曰水犯虛臣謀君兵起國敗

水入虛中大水出巫咸曰伺其出日數之期二十日兵發又以始

入日數之與金同

水中犯乘陵虛海中占曰春旱秋水五穀不成若冬守其陽色赤

黃為旱萬物不成天下兵亂

客星流星彗孛干犯占

客星出虛大臣為亂兵大起國有喪天下多哭泣期三年石氏曰人主

出一曰天子使人于諸侯

二客星出虛天下無主民亡無所

客星入虛黃帝占曰兵在外大飢將死兵散天下有大令郝萌曰

米大貴荆州占曰國亂政急天下飢大人憂 石氏曰客星入虛



色亦有遊客入國色青黑有哭泣一曰色赤有救期七十日  
以白幣至 客星入虛三日強環繞之有救期七十日  
客星出入虛天子自將兵于野 客星犯虛有哭泣事有改田制  
天文錄曰有赦陳卓曰天下有謀若環繞句已之國亂兵起  
客星守虛兵起有亂臣人主不知一曰國君憂之甘氏曰有戮臣  
客星舍虛天下有急行 石氏曰夏三月視虛有二客星將死三  
星相死四星軍敗五星國亡乙巳占客星守虛其國兵起近期一  
年遠二年有哭泣

流星犯虛天下哭泣春夏犯廟官憂秋冬犯天子將兵出野

流星入虛人主有大憂臣相賊有拔邑有亡國一曰有哭泣春夏  
入之宗廟有憂秋冬入之人主自將兵海中占流星入虛兵聚其  
下天文論曰流星入虛色黃有求賜者色青哭泣色黑相死否即逐  
流星出虛貴人疾病一曰君使出外有求於人 出虛色黃而光  
澤有德令相有喜 流星數從虛危中出貴人使出求藥

流星出虛入危小人秉政

彗孛出虛天下亂有叛臣兵大起國易政陳卓曰天子自將兵有大戰  
流血其光芒所指國亡期三年遠五年

彗孛犯虛天下哭泣有改制宗廟起兵國亡一曰多大雨無立垣  
彗孛行犯虛有兵人相殺流血成川積骨如山

彗孛出虛危之間有叛臣起于其國兵大起國易政期三年

雲氣干犯占

雲氣入虛蒼白色有哭泣出之禍除 黃雲氣入虛天子以喜起廟祠  
祀 黃白雲氣入虛享氣也天子敬祀宗廟 赤雲氣入虛有火  
災一曰有兵在廟中出虛有兵廟外 白氣入虛有無幣之客來  
出虛有使出外 黑氣入虛有水災一曰廟圯 雲氣如立虹出  
虛天下大虛多火災



危宿

總敘

危三星曰天府一曰天市土星也主墳墓宮室祭祀主架屋天子之廟堂也又為書姓市其南下九尺為日月五星中道虛危者天子禮堂亦為冢宰之官主天下死喪哭泣之事星明則天下安暗而動則天子作宮室興工役移徙則天下謀作不解失色則客有誅者不見則山陵毀敗動搖則天下大動

日月變異占

日在危蝕宮廟崩陷大臣亂天下改作人主兵起有哭泣

日暈于危其邦有喪一曰其下有廢主

月在危蝕甘氏曰有大喪天下改服石氏曰宮廟有驚又曰不有大喪必有病君一曰大臣死尚服之官有黜者

月暈于危黃帝占曰有兵一曰軍敗郝萌曰國主死民多病止有兵謀不成荆州占曰有亂謀天下擾河圖帝覽嬉曰軍所止民多去

其宅乙巳占曰有喪天下哭武密占曰先舉兵者敗

月在危有變有死喪哭泣山陵墳墓蓋屋動衆之事

月宿危而霧兵起士卒多死

月五星干犯占

月犯危有哭泣帝覽嬉曰天下多治居室者海中占曰國有憂郝萌曰兵在外將死 月入危中宮殿陷大臣逆天下亂

歲星守危祠祀不享數有哭泣之事天子更造宮室人民苦於工役甘氏曰有立諸侯天下民不寧巫咸曰役煩賦重天下屈竭民惡其上強凌弱兵起多盜賊石氏曰諸侯起兵又曰祠祀不共郝萌曰來年多雨處其東民飢

木入危郝萌曰政在臣下荆州占曰天下有受爵土者又曰賊臣起天下亂 木星之危春秋合誠圖曰民無寧處

木舍危南石氏曰天雨血膏王室 木出入留舍危其國君死之木犯危有土工有哭泣事天文志曰兵起一曰徭役煩天下怨天



雨血 木入危守之三十日不下諸侯兵起六十日不下其國  
兵百日不下穀貴客軍將死 荆州占曰木留守危七日以上去  
之四尺王者高其宮闕 木舍危民相惡多盜賊

觀象玩占卷之十五

